

【線上學習】李秉璋原作

神奇、神奇真神奇，上課毋使攔，交通毋會塞，想討學麼个，即學麼个。先生在恁擇，時間在恁選，三更半夜嘛會用，先生講了心色攔分明。佢會用係學生个先生，嘛會用做先生个先生，總講佢桃李滿天下，毋使準備拜師禮，毋使納學費，你想討學，佢即會教。

毋管你係巧神¹抑係預顛²，佢攏收。佢無擇學生、無擇時間、無擇所在，單單擇你，擇你想討學个心。這係學習个革命，這係時代个轉變。來了急、來了緊，跔會著大進步，若像臙身脣有仙人指點，武功大進。

馬桶毋會曉修理有人教，鏈鋸毋會曉發，一步一步來，秘訣³教你知。網路線个接頭線路毋會曉排，有人教你色地愛分明，五花六色照順序，工具攔特別，頭尾一下拗夾落去，接頭插落網路通。

雖然講一個銀角毋會響，毋過先生大部分攏係自家在唱戲，

講到嘴角全波，精神飽滿，歡頭喜面，若像攏毋會恹恹有耐心！一遍教毋會曉，攔教一遍，你想討學幾下回即學幾下回，學到你自家毋莫。

千里緣分一線牽，天下盡在恁彈指。現代生活真舒適，冷氣吹，彈指間，毋使出門、毋使尖車，想討仰子學即仰子學。就算係疫情時務，學校个線上教學，有淡薄無恁自由，毋過嘛有人全然認真，著面聽課，著面查資料，正經係講一知三，師傅渡入門，修行在個人。上課講義自家留，毋使抄，三個快速鍵一抑⁴，滑鼠一箍，講義隨留落來。

當日上課紀錄先生有錄製。驚你單單係「用手機上課定」，人毋知走哪位去。所以先生上課會問問題，一半問，一半係在點名，睜你心思有在無？認真上課个，回答無問題攔會講頭即知尾，無用心个嘛無問題，平平無問題，這個係毋知半件，所以無問題。連先生喊佢回答，佢若像在人間消失，無鏡頭、嘛無回答聲，訊息欄上嘛無留字，所以佢正經係「用手機上課定」。

線上學習，成就隨在人，逐儕有擇个自由，即愛對自家个人生負責。對自家未來正經个慷慨，即係拗一切攏貢獻得現時。今日个恁，成就韶日个恁。

¹ 巧神：音 kioo^ˊ shin^ˋ；聰慧，屬具特殊能力的聰明。

² 預顛：音 ham men；形容人笨拙魯鈍。

³ 秘訣：音 bi^ˊ guad^ˋ；訣竅，指事物的要領、竅門。

⁴ 抑：音 ed^ˋ；按、手用力向下擠壓。

編號 3 號

【鷓鴣飛啊飛】張瑞玲原作

打早，日頭正對東片裡鷓鴣嘴¹個後背升起來，金黃又晟目个金線射入天嶼。佢較緊蹬遐臺一騎即鳴歸路个老鐵馬，來到佢个百果園，猶想講今日日頭一出來即到位，算真早啊！無想著，正蹬入園內，隔壁種大梨个阿權哥即在遐大聲咻啊！「喂！日頭恁高啊正到位哦，敢做有事？」

唉！佢攏恁早啊，猶輸佢，這個阿權哥係歸暗夜毋使睡係無？做麼个會用七早八早即來到位咧？心肝猶在想，嘴又毋肯認輸，對嘴即應佢：「無啦！毋係來做事，係來睺鷓鴣个啦！」

佢个林園在山龍圍核个窩內，若堵著像今日恁个好天氣，打早即會有三、四隻大鷓鴣，在四脣个山嶼飛啊飛。

和阿權哥个嘴鼓都猶咭答煞，聽著遠遠个所在傳來「咻！咻！」个聲，鷓鴣出來啊！阿權哥睺著鷓鴣出來，要緊个山園事頭嘛放落，跔一陣來鬥接梨个工人，坐在佢工寮个蔭影²下欣賞這齣大自然个表演。

睺佢人展開長長个翼胛、利用熱氣，慢慢翹、款款子盤，越

翹越高、若盤若遠，到尾變做天嶼个一粒烏點，親像優雅个天嶼王者，對天嶼睺落佢人守護个土地。

一半下，會睺著佢人胸澄澄、目直直歇在脣頭个樹桎面上，好定泥無聲無說即從落，一瞞目轉身又飛向上，尖尖利利个爪，夾著一尾堵著否運个蛇，即歸路「咻！咻！咻！」風神唼唼飛入密密个樹林內底。

又有時務，睺佢人在高高个天嶼迴來迴去，好定泥，兩裡翼胛一收，對天嶼直直墜落，佢心肝內猶想：「這隻鷓鴣這下包穩死無命啊！」毋過，睺佢硬硬討撞著泥下，翼胛一展、利爪一伸，黏時討頓恬个一瞞目時間，佢遐雙利爪，毋知哪時捉著一隻臘身猶在扭啊扭个大隻老鼠，一轉身又飛到半天高啊！

歸陣人睺鷓鴣表演睺到嘴擘擘，有人講：「難怪，在這林園做恁久个事頭，罕得睺著蛇，即係有這兜鷓鴣守護這兜土地，蹣在這四角輪轉个老嫩大細正有通安心生活啊！」

¹ 鷓鴣嘴：音 rhio` poo` zhe`；東勢東方山峰名，華語稱鷓鴣山。

² 蔭影：音 rhim` rhang`；陰影。

編號 5 號

【虎頭蜂叮著記】李政暉原作

得虎頭蜂叮著啊！

遐日晨早去山底巡水做事，無睺著路脣个竹林面上有大個蜂藪，嘛無細義撞著¹遐支竹篙佢人即尋著佢。惡豺豺²个蜂黏時即飛在佢四輪轉，對佢臉身黏過來。佢陪著一隻睺，知係虎頭蜂即驚著攔緊走，著面退著面陪臉身和頭那毛面上个蜂。退到無蜂个所在正感覺頭那浮浮人怪怪，緊行轉屋下討歇一下。

無幾久佢頭那殼、臉身、手髀和脅下開始作埕會疾：頭那殼感覺即像雲漂在天嶼，又得人綳蹠浮浮腫腫攔纏纏，頭那暈暈³無法度思考。倒手手婆腫到像紅版，手痺痺、手指尾會伸毋會鉤；坐毋會核⁴睡毋會去，唉唉唧唧真成艱難。哪係有陰間，遐個時个佢應該係蹠在內底。

落尾得人送去病院掛急診，講著有十外隻个蜂叮著佢了後，醫生真認真對佢講：普通來講虎頭蜂叮著二十針以上即可能有生

命危險，這款个蜂無解毒个血清，較嚴重有時務會引起過敏性休克抑係溶血个症頭，頭好愛先通知你屋下底个人。醫生安排吊大筒⁵、注射和抽血，交代佢先歇睺，若有麼个無堵好愛黏時講。

等佢略略睡一斂了後，感覺好真多即想討轉去。毋過醫生愛佢加歇一下觀察睺望，頭好等屙尿个尿水色正常，若係變烏暗泥色即較麻煩愛送大間病院。愛攔等一下，無麼个问题正會用出院。頭尾攔無問題醫生猶係掛心講：「開个藥愛照三頓食，有麼个無快活即愛攔緊過來哦。」

轉屋下換衫褲正知攔總叮著十六針，兩隻手髀發癢紅腫，真成癢。倒手婆猶係紅腫無感覺、頭那暈暈想討睡。睡到半夜直直爪，癢到硬討拗皮掀開、爪入骨頭髓去。食藥、抹藥無麼个效。

這滿蜂叮个所在結疔啊，睺著這兜堅疔即攔一擺得佢想著：遐個時務遐兜蜂，佢一個人在山底有幾危險。

¹ 撞著：音 dung choo；接觸、碰到某物。

² 惡豺豺：音 oo' sai' sai'；很凶惡的樣子。

³ 頭那暈暈：音 teu' na' hin' hin'；頭暈暈的、頭暈目眩的樣子。

⁴ 坐毋會核：音 coo' m' bboi hed'；坐不住。

⁵ 吊大筒：音 deeu' tai tung'；吊點滴。